



SCOUTING ANTIANO

Proyekto Edukativo



Vershon 1
Publiká Yanüari 2021

Kontenido

Kontenido	1
Introdukshon	2
Definishon i Konvikshon Fundamental	3
Nos Mishon	6
Prinsipionan ku ta guia nos	7
- Relashon ku bo mes	8
- Relashon ku otronan	9
- Relashon ku mundu	11
- Relashon ku Dios	12
Nos método edukativo	13
- Mantenshon na Promesa i Lei Scout	14
- Enbolbimentu den komunidad	15
- Bida den naturalesa	16
- Siña dor di hasi	17
- Trahando den grupo chikitu	18
- Presensia stimulante di adulto	19
- Sistema simbólico	20
- Kresementu personal	21



Introdukshon

E dokumentu aki ta e promé paso den e proseso pa diseñá un programa edukativo pa hóbennan den Scouting. Nos programa pa hóben ta e lokual nos tin di ofresé, ta nos úniko produkto. Tur lokual Scouting Antiano ta hasi di un òf otro manera ta kontribuí na ehekutá e programa pa hóben i asina kumpli ku e mishon di Scouting Antiano.



Definishon i Konvikshon Fundamental

- Nos ta un movimentu di hóben i adulto ku a komprometé nos mes di un forma liber i boluntario.
- Nos ta un movimentu di edukashon no-formal, ku ta komplementá famia i skol i ku ta trahando pa desaroyo integral i edukashon kontinuo di hóbenan.
- Nos ta kontribuí na desaroyo di e persona kompletu i di tur hende, tantu hòmber komo muhé den plenitud di nan eksistensha i rikesa di nan similaridat i diferenshanan. Tur ser humano, komo persona individual i den nan propio kultura, sin distinsjon di orígen, rasa, kredo òf klase sosial.
- Nos ta eduká pa libertat i ta buska pa desaroyá e kapasidat di pensa, promé ku hañamentu di konosementu òf di un abilidadat spesífiko.
- Nos ta ofresé hóbenan eksperensia di bida konforme balornan ankrá den Lei i Promesa di Scouting i fortifiká den e hóbenan e boluntat pa skohe pa hasi e balornan aki e base pa duna nan un direkshon den nan bida.
- Nos ta enkurashá nan pa biba di akuerdo ku e balornan aki ku alfin nan a skohe p'e.



Definishon i Konvikshon Fundamental

- Nos ta kana en buska di Dios i nos ta pidi nos miembronan pa biba ku fe. Pa ta fiel na e religion ku ta ekspresá e fe ei i pa nan ta un testimonio bibu di nan fe.
- Nos ta kere ku famia ta e fundeshi i base prinsipal di komunidad i sentro di un sivilisashon basá riba amor, bèrdat i hustisia.
- Nos ta eduká pa amor, e forsa kapas di krea un union stabil entre hende.
- Nos ta kere den hustisia sosial komo kondishon pa un desaroyo humano duradero.
- Nos ta boga pa hóbennan sirbi komunidad i komprometé nan mes ku desaroyo di e komunidad komo un ekspreshon di nan preokupashon pa otro, specialmente pa esnan mas pover, mas suak ku nan mes i pa esnan ku ta sufri.
- Nos ta aspirá un komunidad mundial den kua hóbennan por krese i realisá nan kapasidatnan kompletamente.
- Nos ta fomentá lealtat i amor pa nan pais, pueblo i kultura den harmonia ku promoshon pa pas i sin guera di klase of nashon.



Definishon i Konvikshon Fundamental

- Nos ta promové amistad mundial entre hóbennan i koperashon internashonal entre pais i organisashonnan.
- Nos ta stimulá den hóbennan apresio pa naturalesa i pa nan komprometé nan mes ku medio ambiente den su totalidat.
- Nos ta preferá bida den naturalesa komo un eksperensha edukativo i un estilo di bida personal.
- Nos ta forma siudadanonan responsabel ku ta komprondé e dimenshon polítiko di bida den sosiedat, ku ta hunga un ròl konstruktivo den komunidad i ku ta tuma nan desishonnan guiá pa e prinsipionan di Scouting. Sinembargo, komo un movimentu edukativo, nos ta distanshá nos mes for di e lucha pa poder polítiko.
- Nos ta enkurashá hóben i adulto pa kompartí e tarea di kresementu huntu den un relashon di diálogo, kompreshon i partisipashon. Den e enkuentro speshal akí di hóben i adulto, outoridat ta aktua na fabor di libertat di hóbennan.



Nos Mishon

Nos mishon ta pa kontribuí na desaroyo integral i na edukashon kontinuo di hóben pa yuda krea un mundu mihó kaminda hende, komo personanan konsiente di nan balor propio, tin un ròl konstruktivo den nan komunitat.

Den esaki nos ta komprondé bou di "desaroyo integral":

Respetando naturalesa humano ku tur su diferensianan i interesá den hinter e persona nos ta stimulá desaroyo balansá di vários dimenshon di e personalidat di e hóben. Asinaki nos ta fomentá, forma i duna oportunitat pa desaroyá e persona ku tur su variedat di ekspreshon.

E aserkamentu balansá i integral akí ta kombiná desaroyo di kurpa, stimulashon di kreatividat, formashon di karakter, guia di aspekto afektivo, preokupashon pa otro i enkuentro ku Dios. Salú, logro personal, identidat, madures, integrashon sosial i asta felisidat mes ta dependé di un desaroyo harmonioso di tur e aspektonan akí.

Anto bou di "Edukashon Kontinuo":

Hende semper lo keda mira e milagernan di bida humano ku asombro. Hende ta nase, krese i muri pero e proseso di siña semper ta kontinuá. No por limitá ningun aspekto di enseñansa na sistema eskolar òf na un periodo spesífiko di bida ya ku hende tin e nesesidat kontinuo di siña i mester dun'é e oportunitat pa hasi esaki hinter su bida.

Den Scouting, hóbennan ta bira konsiente di e proseso di bida akí dor di purba mehorá nan mes i dor di un esfuerso konstante pa ta mas mihó posibel.



Prinsipionan ku ta guia nos

Nos prinsipionan ta un fundeshi trahá riba balornan esensial i atraktivo i ta e kurason di nos identidat. Lealtat na e balornan aki ta yuda pa duna hóbennan un propósito den bida i un estilo di bida ku ta komprendibel pa nan yega na realisá nan mes i yega na felisidat total i pa duna nan e forsa pa inspirá otro den e mesun direkshon.



Relashon ku bo mes

Kada un di nos ta un promesa grandi i pa e promesa aki bira realidat nos mester lucha pa logra lo mihó di nos mes.

Scouting ta enkurashá hóbennan pa aseptá i uza nan libertat, pa bira responsabel, analisá opshon i tuma desishon. Despues karga e responsabilidadat pa loke nan a disidí i loke nan ta hasi.

E movimentu ta enfatisá e dignidat di kada persona i ta enkurashá nan pa bringa pa sobresalí na tur momentu i komprometé nan mes ku nan plan di bida.

Nos ta reta nos hóbennan pa demonstrá nan honor dor di tene nan mes na nan palabra i di ta leal na otro i honesto ku nan mes, speshalmente ora nan tin ku superá nan debilidatnan propio.

Nos ta enkurashá nos hóbennan pa nan tin un boluntat fuerte, pa purba alkansá nan metanan ku determinashon, para fuerte pa loke nan ta kere aden i pa ta un ehèmpel bibu di loke nan mes ta bisa ku nan ta.

Un persona ku ta biba segun e bèrdatanan akí ta un persona ku integridat, honestidat i ku un karakter fuerte. Un persona ku ta representá un alternativa pa e brio superficial di tendenshanan pasahero i ku ta surpasá tendenshanan di relativismo i permisividat.



Relashon ku otronan

Nos ta kere ku hende ta haña nan vokashon real komo ser humano ora nan uza nan propio boluntat pa aserká otronan.

Nos ta enkurashá hóbennan pa alkansá metanan personal dor di sirbi otro i bira miembronan responsabel, solidario di nan komunitat lokal, nashonal i internashonal sin ningun perhuisio, rasismo òf algun tipo di eksklushon rasial.

Nos ta pidi nan pa respetá i defendé e derechinan di kada persona, ku un konvikshon personal ku ta influenshá nan aktitut.

Nos ta stimulá nos hóbennan pa nan komprometé nan mes ku demokrasia ya ku esaki ta e forma di goberná ku mas tantu ta duna oportunitat igual pa tur i partisipashon den e proseso di tuma desishon. Nos ta enkurashá nos hóbennan pa aseptá i uza outoridat i poder pa buska loke ta bon pa tur.

Nos ta enfatisá e balor di trabou humano pa bienestar komun. Nos ta promové aktivamente derechi di igualdat entre hòmbes i muhé i ta enkurashá hóbennan pa apresia koperashon i enrikesimentu mutuo, sin sintimentu di superioridat òf reklamo òf eksigensia basá riba género.



Relashon ku otronan

Nos ta enkurashá nos hóbennan pa, den nan relashon personal, ekspresá nan sintimentunan di un forma natural, ku rèspèt pa nan propio dignidat i esun di otronan i hasiendo nan komportashon seksual parti di un relashon di amor.

Nos ta enkurashá hóbennan pa nan tin un sentido di humor i un bista alegre riba bida i relashon humano surpasando atversidat i ekspresando nan amor pa bida na tur momento.

Nos ta pidi Scoutnan pa ta konosí pa nan aktitut plasentero, komprensivo i simpátiko, pa demonstrá nan kapasidat pa krea un ambiente kariñoso i amistoso den nan bida, na skol i na trabou.

Un persona guiá pa e balornan sosial akí ta demonstrá ku su propio sistema di bida, ku ta posibel pa alkansá felisidat i realisashon personal dor di sirbi otro; i ta ofresé un alternativa pa tendenshanan ku ta buska plaser komo e úniko fin di tur aktividat humano.



Relashon ku mundu

Nos ta kere firmemente ku humanidat tin un responsabilidat pa kontinuá i komplementá Dios su trabounan di kreashon den mundu.

Nos ta enkurashá hóbennan pa respetá e mundo natural, ku entusiasmo, pa komprometé nan mes ku e lucha pa integridat di e mundo natural i ku ta partisipá aktivamente den konservashon, mantenshon i renobashon di e mundu aki.

Scouting ta ofresé oportunitat pa lanta curiosidat serka e hóbennan, yudando nan pa mantené nan interes pa siña kosnan nobo, trahando ku nan mannan i transformando e kosnan rondó di nan durante nan bida komo adulto i pa deskubrí siensia i téknologia komo algu na disposishon di hende.

Nos ta inspirá hóbennan pa siña mira kos den un lus nobo, pa bolbe inventá, pa imaginá i pa kana kamindanan ku no a eksplorá ainda.

Nos ta enkurashá nan pa atmirá trabou bon hasí i pa aspirá ekselensha. Nos ta enkurashá hóbennan pa ta independiente di kosnan material i pa kontinuamente kita for di nan e hamber pa poseé kos.

Un persona asina lo bai laga e mundu mihó ku el a hañ'é i dor di su ehèmpel inspirá otro pa surpasá apatia, mediokrisidat i konsumismo.



Relashon ku Dios

Ta parti di naturalesa humano pa kuestioná konstantemente nos eksistensha, pa buska e revelashon di nos orígen, naturalesa i destino. Komo kontesta riba e aspektonan misterioso aki, nos ta enkurashá hóbennan pa wak mas aleu di e mundu material, pa nan laga prinsipionan spiritual guia nan i pa semper nan kana en buska di Dios su presensia den nos eksistensha diario, den kreashon, den nos historia i den e hendenan rondó di nos.

Nos ta enkurashá hóbennan pa tuma e mensahe di nan fe na kurason i pa bib'é di un forma total den nan komunidad spiritual, kompartiando komo un famia, ku esnan uní pa religion i teniendo nan mes na nan konvikshon, ekspreshon i selebrashon di nan religion.

Nos ta enfatisá e importansha di hasi fe un parti di nos bida i komportashon diario i pa duna testimonio di nos fe den tur kos ku nos ta hasi.

Mas aleu, miéntras nos ta pidi hóbennan pa buska alegria den nan mes fe, na mes momentu nos ta pidi nan tambe pa respetá i apresιά esnan ku ta buska, haña òf biba otro kontestanan den Dios. Pa mustra interes i kompreshon pa otro religionnan, i pa ta dispuesto na dialogá ku esnan ku tin otro kerensha.

Un persona guiá pa e prinsipionan aki por apresιά, biba i kompartí e dimenshon spiritual di su bida i ku ta habrí pa diálogo i ku kompreshon ta respetá religion di otro.



Nos método edukativo

Pa por realisá nos proyekto edukativo i duna hóbennan e oportunidat pa forma nan bida di akuerdo ku e prinsipionan proponé den e dokumentu aki i pa nan ta e hòMBER i muhéNAN ku nan mes a skohe pa ta, nos ta uza e Método Scout ku ta un sistema kompleto, integral ku vários elemento.



Mantenshon na Promesa i Lei di Scout

E elemento prinsipal ta un invitashon personal na kada hóben na sierto momento durante nan desaroyo, pa hasi un promesa. Ku e promesa aki, hasí dilanti un grupo di hende, e hóben libremente ta disidí di ta fiel na su palabra i pa hasi tur esfuerso pa biba di akuerdo ku e leinan di Scouting.

E lei ta un elemento edukativo dor di kua e prinsipio ku ta guia nos ta keda ekspresá den un forma kla pa hóbennan di tur edat. E desishon ku nan ta tuma pa kumpli ku nan promesa ta un punto di salida pa nan traha pa logra kumpli ku e promesa durante nan hubentut.



Enbolbimentu den komunidad

Komo un ekspreshon di prinsipionan sosial di e Movementu, e Método Scout ta enkurashá hóbennan pa desaroyá un aktitut di solidaridat, tuma akshon konkreto pa sirbi nan komunidad i bira parti di e proseso di desaroyo.

Meskos ku resolvé problema òf kalma doló, servisio ta un manera pa eksplorá realidat, pa siña konosé bo mes i pa deskubrí otro dimenshonnan kultural, siñando na respetá otro sintiendo e aseptashon i rekonosementu di e ambiente sosial, trahando riba un imágen propio i stimulando e iniciativa pa kambia i mehorá bida huntu ku otro.



Bida den naturalesa

Bida den airu liber ta ofresé un ambiente ideal pa aktividatnan di Scouting. Retonan di naturalesa ta laga e hóben desaroyá su kurpa i su abilidadan físiko, di un manera balansá e ta kuida i fortifiká su salú, duna chèns na su posibilidatnan kreativo, uza su libertat, krea lasonan fuerte ku otro hóbennan, komprondé e debernan básiko di bida den sosiedat, balorá mundu, forma su konseptonan estétiko, deskubrí i atmirá órden di kreashon.

E Método Scout ta enkurashá hóben pa hasi e eksperensha aki parti di nan rutina normal i parti di nan propio estilo di bida, drechando konstantemente nan pas interior i bolbiendo bèk kada bes na e ritmo i armonia natural di bida.



Siña dor di hasi

Otro elemento esensial den e Método Scout ta edukashon aktivo, kontrali na instrukshon pasivo. Hóbennan mes ta siña opservá, deskubrí, traha kos, inová i eksperimentá. E manera aki di siña ta duna eksperensha personal ku ta hasi posibel pa hóbennan apsorbá i konsolidá sabiduria, aktitut i kapasidatnan.

E aserkamentu aki ta supstituí e sistema pasivo pa esun aktivo den vários área ku ta relashoná ku otro. For di e punto di bista kognitivo, e simpel resepsion di informashon ta keda remplasá pa e edukashon di sabiduria di bida.

Riba tereno afektivo, en bes di obligá hóbennan, nan mes ta deskubrí regla na un manera natural. Nan ta deskubri pa ordená kosnan, di manera ku disiplina eksterno ta sòru pa disiplina interno. For di e perspektiva di abilitat motóriko en bes di ta reseptornan pasivo, e hóben ta bira protagonista di su propio kreativitat.

Wega ta duna e oportunidat pa eksperenshá, riska, imaginá, soña, proyektá, traha, traha i bolbe traha riba realidat. Tempu ku bo pasa hungando ta un tempu di siñamentu útil ku e Método Scout ta uza komo un espasio speshal pa eksperensha, den kua e hóben ta e aktor prinsipal.

Wega ta duna e hóben oportunidat pa hunga vários ròl, deskubrí regla huntu ku otronan, aseptá responsabilidat, midi forsa, disfrutá triunfo, enfrentá derota i evaluá triunfo i fayó.



Trahandu den grupo chikitu (Sistema di patruya)

Un elemento esensial di e Método Scout ta ku e hóbennan ta pertenesé na gruponan chikí di hóben di mas òf ménos mesun edat. E gruponan aki ta aselerá e integrashon sosial, ta duna e miembronan metanan komun pa identifiká nan mes kuné i ta siña nan kon pa establese lasonan fuerte ku otro hende. Tambe trabou den grupo chikí ta duna e hóbennan responsabilidatnan kada bes mayor, ta desaroyá nan konfiansa propio i ta krea un espasio edukativo i fruktífero den kua nan por krese i desaroyá.

E gruponan chikí i e otro strukturanan ku e Movementu di Scouting ta ofresé na hóbennan pa organisá nan mes di akuerdo ku e propósito edukativo, kaminda e hóbennan ta desaroyá i krea nan propio aktividatnan, ta parse un sosiedat formá pa hóbennan.

E sosiedat aki tin struktura di gobernansa propio i espasio pa partisipashon. Reunion i asamblea ku ta mustra kon pa resolvé desakuerdo i logra akuerdo mutuo. E sosiedat tin tambe su kuerpo pa tuma desishonnan individual i kolektivo i timnan ehekutivo ku ta pone desishon den akshon i ta pone kosnan tuma lugá. Un skol aktivo den kua bo ta siña biba den armonia, demokrasia i efisiensia, ta parti di e bida diario.

Kantidat, tamaño i nòmber di tur e strukturanan aki ta dependé di e nesesidatnan di e hóbennan, ku a surgi for di nan propio karakterístikanan na e diferente etapanan di nan desaroyo.



Presensia stimulante di adulto

Den e proseso di kresementu di e hóbenan, e edukadó adulto, mantenendo su mes komo tal, ta uni su mes ku alegria i ku dinamismo hubenil, dunando testimonio di e balornan di e Movementu i yudando e hóbenan pa deskubri loke lo a keda skondí pa nan.


Di e manera aki hóben i adulto ta establese un relashon di trabou den kua nan ta siña koperá. Mas ainda, komunikashon entre e generashonnan ta mehorá i ta keda demonstrá ku por uza poder i outoridat pa libertat di esnan ku ta ser eduká, guiá i goberná.



Sistema simbólico

E método ta ofresé hóbennan tambe un sèt di elemento simbólico ku un rikesa signifkante ku ta forma e base di e Movementu mes. E símbolonan aki ta motivá i stimulá imaginashon i ta duna balor na ophetivonan kompartí i un sentido di ta parti di un grupo di mucha meskos kuné i ta ofresé ehèmpelnan pa imitá.

Kada un di e etapanan di adelanto tin su propio sistema simbólico ku por ser adaptá na e kapasidat imaginativo i e nesesidatnan di identifikashon di kada grupo.



Kresemantu personal

Scouting, respetando e sistema simbólico di kada etapa di edat tin su seremonianan pa selebrá bida, pa selebrá kresemantu i logro. E desaroyo progresivo di kada individuo ta keda aksentuá pa vários seremonia ku ta konmemorá su bida personal i tradishonnan kompartí den kua e komunidad ta ekspresá su alegria ku e progreso di kada un di su miembronan.

Seremonia ta renobá e sentido di simbolismo, reforsá e unidat di grupo i krea un ambiente ku ta enkurashá kada miembro pa pensa riba e balornan ku ta yena aktivitatnan diario.

Pa e kresemantu personal tuma lugá, Scouting su programa pa hóben ta kontené un Skema Progresivo di Ophetivo, Aktivitat i Eksperensha.

E ekspreshon di e Método Scout mas visibel i atraktivo ta su programa variá di aktivitatnan, ku ta inkorporá tur e otro elementonan di e Método di un forma natural i armonioso. E programa di aktivitat aki ta ofresé hóbennan alternativanan ku ta basá riba nan interesnan i ta laga nan skohe esnan ku nan gusta mas.

E aktivitatnan aki di kua algun ta fiho i mayoria variá, ta duna hóbennan eksperenshanan personal ku ta yuda nan logra e metanan ku e Movementu di Scouting ta proponé pa e diferente etapanan di nan bida.



Kresementu personal

E ophetivonan ta basá riba loke ta nesesario pa un kresementu armonioso di e hóben i esakinan ta varia segun edat. E ophetivo, aktivitatnan i eksperensha ta yuda e hóben pa traha progresivamente pa yega na e propósito edukativo di e Movementu di Scouting.

E aktivitatnan ku e método ta ofresé ta enserá retonan ku ta stimulá e hóben pa superá su mes. Nan ta duna eksperenshanan ku ta enseñansanan bèrdadero, nan ta duna e hóben e sensashon di a alkansá algu i nan ta spièrta nan deseo pa eksperenshanan nobo.

Pa e motibunan aki nos ta bisa ku nan ta desafiante, útil, di rekompensa i atraktivo. Kualke aktivitat ku ta di akuerdo ku e ideanan aki ta bon pa inkluí den e programa pa hóbennan, ku ta trahá dor i pa hóbennan, ehekutá i evaluá huntu ku nan, uzando diferente método nan di akuerdo ku e diferente etapanan di desaroyo.



Referensia

E publikashon aki ta un esfuerso konhunto na benefisio di miembronan di Scouting Antiano. Scouting Antiano ke kontribuí na formashon di hóbennan en general. Uso di e materialnan produsí dor di Scouting Antiano por keda uzá pa otro organisashonnan despues di haña pèrmit di Scouting Antiano pa esaki. No ta pèrmiti reprodukshon di e material (ni parti di e material) sin pèrmit di Scouting Antiano.

Buki i dokumentu manera esaki ta produsí dor di un persona òf grupo di persona bou di enkargo di Scouting Antiano. Tur buki i dokumentu por bira mihó i pa esaki nos ta pidi kontribushon di tur esnan ku uza e material aki.

Uza e buki aki bon i si bo topa kualkier eror òf bo tin kualkier sugerensia òf komentario kon pa amplia, mehorá òf hasi kontenido di e material aki mas útil djis manda esaki pa nos via email info@scoutingantiano.org.

Proyekto Edukativo di Scouting Antiano ta resultado di estudio di e proyekto edukativo presentá na nivel di region inter-amerikano di Scouting Mundial i adaptashon di esaki na nos situashon i kultura lokal. Un trabou hasi pa nos ret di programa bou di guia di komisario di programa Idylliëne Corsen-Simon.

Un danki speshal na Fundashon Konstruí Awe i Mañan pa finansiá e produkshon.



Un produkshon di
Scouting Antiano